



Los ntawm Thawj Tswj Hwm Henry B. Eyring
Tus Pab Cuam thib Ib hauv Thawj Pawg Thawj Tswj Hwm

Tsis Txhob Ntshai Ua Zoo

Tus Tswv qhia peb tias thaum peb muaj kev ntseeg sawv saum Nws lub pob zeb, peb txoj kev ntshai thiab kev ua xyem xyav ploj zuj zus mus; kev xav ua zoo loj tuaj.

Kuv cov kwv tij thiab cov muam, kuv txo hwj chim hais tias tus Tswv tus Ntsuj Plig yuav nrog peb nyob thaum kuv hais lus hnuv no. Kuv lub siab puv npo ua tsaug rau tus Tswv, rau tej kev tshoov siab uas peb tau hnov thaum neeg thov Vajtswv, hais tej lus zoo, thiab hu nkauj nyob hauv lub rooj sab laj.

Lub Plaub Hlis Ntuj tas los, Thawj Tswj Hwm Thomas S. Monson hais ib zaj lus uas tshoov tib neeg lub siab nyob thoob plaws lub ntiaj teb, tsis hais kuv lub siab los yog. Nws hais txog lub hwj chim ntawm Phau Ntawv Maumoos. Nws yaum kom peb kawm, xav txog, thiab ua raws li phau ntawv no tej lus qhia. Nws cog lus tias yog peb siv sij hawm txhua hnuv kom kawm thiab xav txog thiab ua raws li tej lus txib uas nyob hauv Phau Ntawv Maumoos, peb yuav muaj ib zaj lus tim khawv hais tias phau ntawv no muaj tseeb, thiab zaj lus tim khawv txog tus Khetos uas muaj txoj sia nyob yuav pab peb thaum peb raug teeb meem. (Saib “Lub Hwj Chim ntawm Phau Ntawv Maumoos,” *Liahona*, Tsis Hlis Ntuj 2017, 86–87.)

Zoo ib yam li nej feem coob, kuv twb mloog tus yaj saub tej lus zoo li yog tus Tswv lub suab hais lus rau kuv. Thiab, ib yam li nej feem coob, kuv tau txiav txim siab ua raws li tej lus ntawd. Nim no, txij thaum kuv yog ib tug tub hluas, kuv twb paub tseeb tias Phau Ntawv Maumoos yog Vajtswv txoj lus, Leej Txiv thiab Leej Tub twb tshwm sim thiab hais lus rau Yauxej Xamiv, thiab cov Thwj Tim thaum ub tau los tus Yaj Saub Yauxej kom muab yuam sij pov thawj hwj txum tim rov qab los rau tus Tswv lub Koom Tsoos.

Vim kuv paub li ntawd, kuv twb nyeem Phau Ntawv Maumoos txhua hnuv tau 50 xyoo tawm. Yog li ntawd tej zaum tsim nyog kuv xav tias Thawj Tswj Hwm Monson hais rau lwm tus xwb. Tiam sis, ib yam li nej feem coob, kuv tau hnov tus yaj saub tej lus txhawb nqa thiab nws tej lus cog tseg caw kuv kom siv zog ntxiv. Nej feem coob tau ua li kuv tau ua: thov Vajtswv kawg siab kawg ntsws, xav txog vaj lug kub ntxiv, thiab siv zog ua hauj lwm rau tus Tswv thiab sawv Nws cev pab lwm tus.

Twb tau muaj raws li tus yaj saub cog lus rau kuv, thiab rau nej feem coob. Peb cov uas tau mloog nws tej lus ntuas twb haj yam hnov tus Ntsuj Plig ntxiv. Twb ua rau peb tiv tau kev ntxias thiab muaj kev ntseeg ntxiv txog Yexus Khetos uas sawv rov los, Nws txoj moo zoo, thiab Nws lub Koom Tsoos.

Nyob hauv ib lub caij nyoog uas ntxhov siab heev, qhov uas peb zaj lus tim khawv muaj zog tuaj ua rau peb tsis ntshai thiab tsis ua xyem xyav thiab nyob kaj siab lug. Qhov uas kuv mloog Thawj Tswj Hwm Monson tej lus ntuas tau ua yam zoo rau kuv: Qhov thib ib, tus Ntsuj Plig uas nws cog lus tias yuav los ua rau kuv xav zoo txog tej uas yuav muaj los thaum yav tom ntej, txawm yog kev ntxhov hnyo loj tuaj nyob hauv lub ntiaj teb. Thiab qhov thib ob, tus Tswv tau muab rau kuv—thiab nej—ib txoj kev paub txog Nws txoj kev hlub cov uas nyuaj siab. Ua rau peb haj yam xav mus pab cawm lwm tus. Kev xav ua li ntawd yeej yog lub ntsiab ntawm Thawj Tswj Hwm Monson tej lus qhuab qhia.

Thaum tus Yaj Saub Yauxej Xamiv thiab Oliver Cowdery muaj tej yam nyuaj ua tus Tswv tau cog lus tias nkawd yuav hlub lwm tus thiab ua siab loj. Tus Tswv hais tias kev ua siab loj yuav los ntawm nkawd txoj kev ntseeg Nws uas yog nkawd lub pob zeb:

“Tsis txhob ntshai ua qhov zoo, kuv ob tug tub, vim tias tej yam uas neb yuav tseeb, tej ntawd kuj yog tej uas neb yuav tau sau; yog li ntawd, yog hais tias neb tseeb tej uas zoo ces neb yuav tau sau tej uas zoo los ua neb nqi zog.

“Yog li ntawd, tsis txhob ntshai, pab yaj; cia li ua tej uas zoo; cia lub ntiaj teb thiab ntuj txiag teb tsaus los koom ua ke tawm tsam neb, vim yog neb cog rau saum kuv lub pob zeb, ces lawv yuav kov tsis yeej.

“Saib seb, kuv tsis rau txim rau neb; neb mus neb thiab tsis txhob ua txhaum ntxiv; ua tiag tiag ua txoj hauj lwm uas kuv tau txib neb.

“Ntsia ntsoov kuv nrog txhua txoj kev xav; tsis txhob xyem xyav, tsis txhob ntshai.

“Saib tej qhov txhab uas raug nkaug to ntawm kuv sab tav, thiab tej caws pliav los ntawm ntsia hlau uas nyob ntawm kuv ob txhais tes thiab ob txhais ko taw; cia li rau siab ntseeg, ua raws li kuv tej lus txib, thiab neb yuav tau txais lub nceeg vaj ceeb tsheej ua neb tug” (Q&K 6:33–37).

Tus Tswv tau qhia Nws cov thawj coj txog txoj Kev Muab txoj Moo Zoo Txum Tim Rov Qab Los, thiab nws qhia peb, hais tias thaum peb muaj kev ntseeg sawv saum Nws lub pob zeb, peb txoj kev ntshai thiab kev ua xyem xyav ploj zuj zus mus; kev xav ua zoo loj tuaj. Thaum peb txais yuav Thawj Tswj Hwm Monson txoj kev caw kom cog ib zaj lus tim khawv txog Yexus Khetos nyob hauv peb lub siab, ua rau peb tau lub hwj chim, kev xav, thiab kev ua siab loj mus cawm lwm tus es peb tsis txhawj txog peb tus kheej.

Kuv twb pom kev ntseeg thiab kev ua siab loj ntau zaum thaum Tsoom Haiv Neeg Ntseeg hauv Hnub Nyoog Kawg raug kev sim siab tsaus ntshai heev. Ua piv txwv hais tias, kuv nyob hauv Idaho thaum Qhov Chaw Tauv Dej Teton tawg thaum lub Rau Hli Ntuj 5, 1976. Dej los nyab txhua yam. Ntau txhiab tus neeg khiav ntawm lawv lub tsev mus. Ntau txhiab lub tsev thiab kev ua lag luam twb raug puas tsuaj. Yog ib qho txuj ci tseem ceeb uas tsuas muaj 15 tus neeg xiam.

Qhov uas kuv pom nyob ntawd, kuv twb pom thaum twg Tsoom Haiv Neeg Ntseeg hauv Hnub Nyoog Kawg sawv ruaj khov saum lub pob

zeb uas yog ib zaj lus tim khawv txog Yexus Khetos. Vim lawv tsis ua xyem xyav Nws saib xyuas lawv, lawv thiaj tsis ntshai Lawv tsis xav txog lawv tej kev sim siab thiab mus pab lwm tus xwb. Thiab lawv ua li ntawd vim lawv hlub tus Tswv, lawv tsis thov kom txais nqi zog.

Ua piv txwv hais tias, thaum Qhov Chaw Tauv Dej Teton tawg, ib khub niam txiv uas yog ob tug Neeg Ntseeg hauv Hnub Nyoog Kawg twb mus ua si nyob deb ntawm nkawd lub tsev. Thaum nkawd hnov xov xwm hauv lub xov tooj cua, nkawd rov qab los rau Rexburg sai sai. Tiam sis nkawd tsis tau mus rau nkawd lub tsev seb puas puas tsuaj tas, nkawd cia li mus nrhiv nkawd tus npisov. Nws twb nyob hauv ib lub tsev uas tib neeg siv ua ib qho chaw kom npaj kho. Nws twb pab coj neeg coob uas ua siab dawb pab uas tuaj nyob hauv cov npav kawm ntawv xim daj.

Khub niam txiv no mus rau tus npisov thiab hais tias, “Wb nyuam qhuav rov qab los. Npisov, wb yuav mus qhov twg kom pab tau?” Nws muab ib tsev neeg lub npe rau nkawd. Khub niam txiv ntawd tau khawb av nkos thiab dej nyob hauv ib lub tsev dhau ib lub. Nkawd tau ua hauj lwm txij thaum sawv ntxov mus txog hmo ntuj tau ob peb hnub. Ces nkawd tau so kom mus saib nkawd lub tsev. Nkawd lub tsev twb raug dej nyab tshoob mus lawm, tsis muaj dab tsi tu tau. Nkawd thiaj li tig rov qab mus rau tus npisov. Nkawd nug hais tias, “Npisov, koj puas muaj leej twg uas wb pab tau?”

Ib xyoo dhau ib xyoo thiab nyob thoob plaws lub ntiaj teb twb pom qhov txuj ci tseem ceeb no uas yog kev ua siab loj thiab kev siab hlub—Khetos txoj kev hlub dawb paug. Twb muaj li no thaum lub sijhawm uas lawv raug kev tsim txom thiab kev sim siab hauv tus Yaj Saub Yauxej Xamiv lub caij nyoog nyob hauv Missouri. Twb muaj li no thaum Brigham Young coj tib neeg tawm ntawm Nauvoo mus ces hu Tsoom Haiv Neeg Ntseeg rau tej qhov chaw

moj sab qhua nyob thoob plaws lub Teb Chaws Amelikas sab hnub poob, kom ib leeg pab ib leeg txhim tsa Xi-oos rau tus Tswv.

Yog tias nej nyeem cov pioneer no tej phau ntawv ceev xwm txheej, nej yuav pom kev ntseeg uas ntiab kev ua xyem xyav thiab kev ntshai tawm. Thaum nej nyeem txog qhov uas Tsoom Haiv Neeg Ntseeg tso lawv tej kev xav tau tseeg kom pab tau lwm tus rau tus Tswv, ua ntej lawv tu lawv cov yaj los yog rov qab mus rau lawv cov tiaj nras uas tseem tsis tau laij.

Kuv twb pom qhov txuj ci tseem ceeb no ob peb hnub tas los tom qab Hurricane Irma raug Puerto Rico, Saint Thomas, thiab Florida, nyob ntawd Tsoom Haiv Neeg Ntseeg hauv Hnub Nyoog Kawg koom nrog lwm lub koom txoos, tej pawg hauv zej zog, thiab tej lub koom haum uas nyob thoob plaws lub teb chaws kom pib tu khoom.

Zoo li kuv cov phooj ywg nyob hauv Rexburg, ib khub niam txiv uas tsis yog mej zeej nyob hauv Florida tau tsom ntsoov pab cov neeg zej zog thiab tsis tau ua hauj lwm tu nkawd tus kheej qhov chaw nyob. Thaum cov neeg zej zog uas yog Haiv Neeg Ntseeg hauv Hnub Nyoog Kawg qhia tias lawv mam li pab tshem ob tug ntoo loj uas thaiv nkawd txoj kev nres tsheb, khub niam txiv no piav hais tias nkawd ntxhov siab heev es nkawd thiaj li mus pab lwm tus, nkawd muaj kev ntseeg tias tus Tswv yuav muab kev pab uas nkawd xav tau nyob ntawm nkawd lub tsev. Tus txiv tsev qhia tias ua ntej peb lub Koom Txoos cov mej zeej tuaj xav muab kev pab, nws thiab nws tus poj niam tau thov Vajtswv. Nkawd txais lus teb hais tias kev pab yuav los. Kev pab twb los ob peb teev tom qab nkawd txais kev nplij siab li ntawd.

Kuv twb hnov xov hais tias ib txhia hu Tsoom Haiv Neeg Ntseeg hauv Hnub Nyoog Kawg uas hnab tsho xim daj Helping Hands ua “Cov Tim Tswv Daj.” Ib tug Neeg Ntseeg hauv Hnub Nyoog Kawg mus kho nws lub tsheb, thiab tus txiv neej uas yuav

kho piav txog lub sij hawm uas nws hnov tus ntsuj plig thaum tib neeg uas hnav tsho daj tshem cov ntoo ntawm nws lub tiaj nyom ces, nws hais tias, lawv “hu ib zaj nkauj rau kuv txog qhov uas kuv yog Vajtswv tus me nyuam.”

Ib tug uas nyob hauv Florida ntxiv—uas tsis koom peb txoj kev teev ntuj—hais txog thaum ib Tsoom Haiv Neeg Ntseeg hauv Hnub Nyoog Kawg tau los rau nws lub tsev thaum nws ua hauj lwm hauv nws lub tiaj nyom uas raug puas tsuaj tas thiab nws ntxhov siab, sov dhau, thiab xav quaj. Nws hais tias, cov uas pab dawb tau tsim “ib qho txuj ci tseem ceeb.” Tsis yog lawv rau siab ua hauj lwm xwb, tiam sis lawv kuj luag nyav thiab tso luag, tsis xav txais nqi zog dab tsi.

Kuv twb pom kev rau siab li ntawd thiab hnov kev luag thaum, hnub Saturday lig, kuv nrog ib Tsoom Haiv Neeg Ntseeg hauv Hnub Nyoog Kawg tham nyob hauv Florida. Cov uas pab dawb nres lawv txoj kev tu khoom ntev tsaus cia kuv tuav tes xwb. Lawv hais tias 90 tus mej zeej ntawm lawv ceg txheem ntseeg nyob hauv Georgia tau npaj los pab cov neeg nyob hauv Florida thaum ib hmo ua ntej lawv mus xwb.

Lawv tau sawv kev los ntawm Georgia mus thaum 4:00 sawv ntxov, tsav tshob tau peb plaub teev, ua hauj lwm txog tsaus ntuj, thiab tau npaj siab ua hauj lwm thaum hnub tom qab ntawd.

Lawv luag nyav thiab zoo siab piav rau kuv txog tag nrho tej yam no. Qhov uas lawv txhawj xwb yog qhov uas lawv tsis xav lwm tus ua lawv tsaug ntxiv lawv thiaj yuav rov qab ua tau hauj lwm. Ceg txheem ntseeg tus thawj tswj hwm tau rov qab qhib nws rab kaw uas siv roj thiab nws tab tom muab ib tug ntoo uas tau vau txiav thaum peb rov qab mus hauv tshob mus ntsib lwm pawg uas pab neeg.

Hnub ntawd, thaum peb tawm lwm qhov chaw mus, ib tug txiv neej tau tuaj txog peb lub tshob, hle nws lub kaus mom, thiab ua peb tsaug rau cov uas pab dawb. Nws hais tias,

“Kuv tsis yog ib tug mej zeej ntawm nej lub koom txoos. Kuv ntseeg tsis tau nej tau ua li no rau peb. Thov Vajtswv foom koob hmoov rau nej.” Tus mej zeej uas pab dawb uas sawv ntawm nws ib sab luag nyav thiab tshoom xub pwg zoo li nws tsis xav lwm tus qhuas nws.

Thaum cov uas pab dawb los ntawm Georgia tau tuaj pab tus neeg uas ntseeg tsis tau no, Tsoom Haiv Neeg Ntseeg hauv Hnub Nyoog Kawg coob heev nyob hauv qhov chaw uas raug puas tsuaj ntawm Florida ntawd tau mus deb heev rau ib qho chaw ntxiv nyob hauv Florida sab qab teb thaum lawv hnov txog cov neeg uas raug kev puas tsuaj loj dua li lawv.

Hnub ntawd, kuv twb nco txog, thiab haj yam to taub tus Yaj Saub Yauxej Xamiv tej lus hais tias: “Ib tug neeg uas muaj Vajtswv txoj kev hlub puv nkaus nws lub siab, yuav tsis zoo siab vim nws tsev neeg tau koob hmoov xwb, tiam sis nws xav tawm mus thob plaws ntiaj teb no foom koob foom hmoov rau tib neeg sawv daws” (*Teachings of Presidents of the Church: Joseph Smith* [2007], 426).

Peb pom txoj kev hlub nyob hauv Tsoom Haiv Neeg Ntseeg hauv Hnub Nyoog Kawg lub neej nyob txhua qhov chaw. Txhua lub sij hawm muaj tej xwm txheej ceev nyob qhov twg hauv lub ntiaj teb no, Tsoom Haiv Neeg Ntseeg hauv Hnub Nyoog Kawg ua siab dawb siv sij hawm thiab rau siab ua lub Koom Txoos tej hauj lwm pab tib neeg. Feem ntau los tsis tas thov lawv ua. Muaj tseeb tiag, tej lub sij hawm peb yuav tsum thov cov uas xav paub kom tos mus txog qhov chaw pab neeg mus txog thaum cov uas koj tej hauj lwm ntawd twb npaj lawm kom txais tau lawv.

Txoj kev xav foom koob hmoov rau lwm tus yog ib yam uas los thaum tib neeg muaj ib zaj lus tim khawv txog Yexus Khetos, Nws txoj moo zoo, Nws lub Koom Txoos, thiab Nws tus yaj saub. Yog vim li no tus Tswv cov neeg thiaj li tsis ntshai thiab tsis ua xyem xyav. Yog vim li

no cov tub txib pab dawb nyob hauv txhua qhov chaw ntawm lub ntiaj teb. Yog vim li no cov niam tsev txiv tsev nrog lawv cov me nyuam thov Vajtswv pab lwm tus. Yog vim li no cov thawj koj tau twv lawv cov tub hluas ntxhais hluas ua raws li Thawj Tswj Hwm Monson hais kom nyeem Phau Ntawv Maumoos. Twb muaj li no tsis yog vim cov thawj koj yaum lawv tiam sis yog los ntawm cov tub hluas ntxhais hluas thiab cov mej zeej txoj kev rau siab ntseeg. Kev ntseeg zoo li ntawd, uas yuav tsum ua kev txi pub yus tus kheej kom muaj, ua rau lawv hloov siab uas ua rau lawv hnov tau Vajtswv txoj kev hlub.

Tiam sis, peb lub siab yuav hloov li ntawd tsaus yog thaum peb tseem ua raws li tus yaj saub tej lus ntuas. Yog peb tsum tom qab peb ua ib zaug xwb, ces peb txoj kev hloov yuav ploj zuj zus.

Tsoom Haiv Neeg Ntseeg hauv Hnub Nyoog Kawg lawv txoj kev ntseeg muaj zog tuaj, ntseeg tus Tswv Yexus Khetos, ntseeg tias Phau Ntawv Maumoos yog Vajtswv txoj lus, ntseeg tias tau muab cov yuam sij pov thawj hwj nyob hauv Nws lub Koom Txoos tseeb txum tim rov qab los. Zaj lus tim khawv no ua rau peb haj yam ua siab loj thiab txhawj txog lwm tus uas yog Vajtswv cov me nyuam. Tiam sis yuav tsum muaj ntxiv rau tej teeb meem thiab cib fim thaum yav tom ntej.

Peb pom tsis tau txhua yam, tiam sis peb paub lub ntsiab. Peb paub hais tias nyob hauv hnub nyoo kawg, lub ntiaj teb yuav ntxhov hnyo. Peb paub tias txawm yog peb raug teeb meem dab tsi los, tus Tswv yuav koj Tsoom Haiv Neeg Ntseeg hauv Hnub Nyoog Kawg mus kom qhia Yexus Khetos txoj moo zoo rau txhua haiv neeg, xeem neeg, yam lus, thiab cov neeg. Thiab peb paub tias tus Tswv cov thwj tim tseeb yuav tsum nyog thiab npaj txais Nws thaum Nws rov qab los. Peb tsis tas ntshai.

Yog li ntawd, txawm peb muaj kev ntseeg thiab ua siab loj lawm los, tus Tswv xav kom peb ua ntxiv—thiab

xav kom tej tiam neeg uas yuav nyob tom qab peb ua ntxiv. Lawv yuav tsum muaj zog thiab ua siab loj tshaj vim lawv yuav ua tej yam zoo dua thiab nyuaj dua tej uas peb tau ua. Thiab lawv yuav raug tus yeeb ncuab ntawm peb tej ntsuj plig txoj kev tawm tsam uas loj zuj zus tuaj.

Tus Tswv tau qhia kom peb xav zoo thaum peb mus tom ntej: “Ntsia ntsoov kuv nrog txhua txoj kev xav; tsis txhob xyem xyav, tsis txhob ntshai” (Q&K 6:36). Thawj Tswj Hwm Monson tau qhia peb ua li ntawd. Peb yuav tsum xav thiab ua raws li Phau Ntawv Maumoos thiab cov yaj saub tej lus. Thov tsis tu tsis tseg. Cia li ntseeg. Ua hauj lwm rau tus Tswv kawg siab kawg ntsws kawg dag kawg zog. Peb yuav tsum thov Vajtswv kawg siab kawg ntsws kom muaj lub txiaj ntsim uas yog kev siab hlub, Khetos txoj kev hlub dawb pawg (saib Maulaunais 7:47–48). Thiab qhov tseem ceeb, peb yuav tsum siv zog ua raws li cov yaj saub tej lus ntuas tsis tu tsis tseg.

Thaum txoj kev ntawd nyuaj heev, peb tso siab rau tus Tswv tej lus cog

tseg los tau—yog tej lus cog tseg uas Thawj Tswj Hwm Monson qhia rau peb thaum nws hais txog tus Cawm Seej tej lus no: “Yog leej twg txais yuav nej, kuv kuj yuav nyob ntawd thiab, vim kuv yuav ua nej ntej mus. Nws yuav nyob ntawm nej sab xis thiab ntawm nej sab laug, thiab Nws tus Ntsuj Plig yuav nyob hauv nej lub siab, thiab Nws cov tim tswv saum ntuj yuav nyob ib ncig ntawm nej, kom thiaj txhawb nqa tau nej (Q&K 84:88).

Kuv ua tim khawv tias tus Tswv ua nej ntej thaum nej ua Nws txoj hauj lwm. Tej lub sij hawm nej yuav ua tus tim tswv uas tus Tswv xa kom txhawb nqa lwm tus. Tej lub sij hawm nej yog tus uas cov tim tswv nyob ib puag ncig kom txhawb nqa nej. Tiam sis nej yeej yuav muaj Nws tus Ntsuj Plig hauv nej lub siab, ib yam li tau cog lus rau nej nyob hauv txhua txoj kev sib ntsib txais lub cim nco txog. Nej yuav tsum ua raws li Nws cov lus txib xwb.

Tej hnuv zoo tshaj plaws rau Vajtswv lub nceeg vaj hauv lub ntiaj teb yog thaum yav tom ntej. Kev

tawm tsam yuav ua rau peb txoj kev ntseeg Yexus Khetos muaj zog tuaj, zoo ib yam li nyob hauv tus Yaj Saub Yauxej Xamiv lub caij nyoog. Kev ntseeg kov yeej kev ntshai txhua lub sij hawm. Kev sawv ua ke ua rau peb koom siab koom ntsws. Thiab nej tej kev thov Vajtswv kom pab cov uas xav tau los Vajtswv uas hlub peb hnov thiab teb tej lus thov ntawd. Nws tsis tsaug zog hlo li.

Kuv ua tim khawv hais tias Vajtswv Leej Txiv muaj txoj sia nyob thiab xav kom nej rov qab los cuag Nws. Nov yog tus Tswv Yexus Khetos lub Koom Txoos tseeb. Nws paub nej, Nws hlub nej, thiab Nws saib xyuas nej. Nws tau theej nej lub txhoj thiab kuv lub txhoj thiab tag nrho Leej Txiv Saum Ntuj Ceeb Tsheej cov me nyuam lub txhoj. Kev coj raws li Nws nyob hauv nej lub neej thiab thaum nej pab lwm tus yog tib txoj kev kom tau txoj sia nyob mus ib txhis.

Kuv ua tim khawv li no thiab foom koob hmoov thiab kuv txoj kev hlub rau nej. Los ntawm Yexus Khetos lub npe dawb ceev, amees.

Kev Qhia rau Peb lub Caij Nyoog

Txij thaum lub Kaum Ib Hlis Ntuj xyoo 2017 mus txog lub Plaub Hlis Ntuj xyoo 2018, yuav tsum npaj ib zaj los yog ob peb zaj lus hais los ntawm lub Kaum Hli Ntuj xyoo 2017 lub tuam rooj sab laj kom qhia hauv pawg Pov Thawj Hwj Mekixedes thiab Koom Haum Niam Tsev tej kev sib ntsib thaum hnuv Sunday. Thaum Plaub Hlis Ntuj xyoo 2018, xaiv tau tej zaj los ntawm lub Plaub Hlis Ntuj xyoo 2016 los sis Kaum Hli Ntuj xyoo 2015 lub tuam rooj sab laj. Ceg txheem ntseeg thiab koog chaw cov thawj tswj hwm xaiv tej zaj lus hais uas yuav siv nyob hauv lawv tej cheeb tsam, los yog lawv muab lub luag hauj lwm no so rau cov npisov los yog ceg ntseeg cov thawj tswj hwm xaiv los tau thiab.

Cov lus hais no muaj txawm peem ua ntau yam lus nyob rau ntawm conference.lds.org.



Los ntawm Thawj Tswj Hwm Dieter F. Uchtdorf
Tus Pab Cuam thib Ob hauv Thawj Pawg Thawj Tswj Hwm

Peb tug Viv Ncaus

Peb lav ris peb txoj kev ua ib tug thwj tim, thiab yeej tsis nyob ntawm seb lwm tus ua li cas rau peb hlo li.

Cov muam, cov phooj ywg zoo, qhov uas peb muaj kev sib ntsib rau cov poj niam nyob thoob plaws lub ntiaj teb no kom qhib lub tuam rooj sab laj yeej yog ib qho tseem ceeb thiab zoo kawg nkaus. Cia li xav, cov poj niam koom siab koom ntsws vim lawv ntseeg thiab hlub tus Tswv Yexus Khetos, tsis hais nej hluas los yog nej laus, nej lub neej zoo li cas dhau los, nej yog haiv neeg dab tsi, thiab nej hais yam lub twg.

Thaum peb sib ntsib nrog peb tus yaj saub Thawj Tswj Hwm Thomas S. Monson, nws qhia rau peb hais tias nws hlub tus Tswv npaum li cas. Thiab kuv paub tias Thawj Tswj Hwm Monson ua nej tsaug rau nej txoj kev hlub, nej tej lus thov Vajtswv, thiab nej txoj kev muab siab npuab tus Tswv.

Puag thaum ub nyob hauv ib lub teb chaws nyob deb deb heev muaj peb tug viv ncaus nyob.

Tus viv ncaus thib ib **tu siab**. Nws xav tias txhua yam txog nws tus kheej tsis tshua zoo txaus tsis hais nws qhov ntswg, puab tsaig, thiab ntiv taw los yog. Thaum nws hais lus, tej lub sij hawm nws hais txawv txav, thiab

tib neeg luag nws. Thaum ib tug neeg cem nws los sis txhob txwm tsis caw nws tuaj koom nrog lawv, nws txaj muag taug kev mus nrhiav ib qho chaw nkaum es nyob ntawd nws xyu yam li nyuaj siab thiab xav paub vim li cas nws lub neej tsis muaj kev cia siab thiab kev zoo siab.

Tus viv ncaus thib ob **chim siab**. Nws xav tias nws txawj ntse heev, tiam sis yeej muaj lwm tus uas ua tau zoo dua thaum xeem ntawv nyob hauv tsev kawm ntawv. Nws xav tias nws txawj tuaj dab ros, ncaj, txawj hnav khaub ncaws, thiab ntxim nyiam. Tiam sis, yeej muaj lwm tus uas txawj tuaj dab ros, ncaj, txawj hnav khawb ncaws, los yog ntxim nyiam tshaj nws.

Nws yeej tsis yog tus thib ib thaum ua txhua yam, ua rau nws tsis txaus siab hlo li. Yeej tsis tsim nyog uas nws lub neej yuav zoo li no!

Tej lub sij hawm nws npau taws rau lwm tus, thiab txhua lub sij hawm zoo li ib qho me me xwb yuav ua rau nws chim siab.

Vim nws ua li no nws yeej tsis ntxim nyiam thiab tsis muaj koob muaj npe. Tej lub sij hawm nws tau zom nws kaus hniav, nyem nws ob

lub nrig, thiab xav hais tias, “Lub neej no tsis ncaj hlo li!”

Ces kuj muaj tus viv ncaus thib peb. Tsis zoo li nws ob tug viv ncaus uas tu siab thiab chim siab, nws yeej **zoo siab**. Thiab tsis yog vim nws txawj ntse tshaj los yog zoo nkauj tshaj los yog muaj peev xwm tshaj nws ob tug viv ncaus. Tej lub sij hawm, tib neeg tau tso nws tseg thiab. Tej lub sij hawm lawv luag nws vim yog tej yam nws hnav los yog tej yam nws hais. Tej lub sij hawm lawv hais lus phem txog nws. Tiam sis nws tsis tshua quav ntsej tej ntawd.

Tus ntxhais no nyiam hu nkauj. Nws tsis txawj hu nkauj zoo zoo, thiab tib neeg luag nws, tiam sis qhov no tsis ua rau nws tsum tsis txhob hu nkauj. Nws hais tias, “Kuv tsis kam cia lwm tus neeg thiab lawv tej kev xav ua rau kuv tsum tsis txhob hu nkauj ntxiv!”

Qhov uas nws hu nkauj tsis tu tsis tseg ua rau nws tus niam laus thib ib tu siab thiab nws tus niam laus thib ob chim siab.

Ntau xyoo dhau mus, ces twb txog lub sij hawm rau peb tug viv ncaus no tas lawv lub neej nyob hauv lub ntiaj teb no.

Tus viv ncaus thib ib, uas pheej kawm hais tias yeej muaj kev poob siab ntau hauv lub neej no, nws *tu siab* thaum nws tas sim neej.

Tus viv ncaus thib ob, uas txhua hnuv nrhiav tau ib yam dab tsi tshiab uas nws tsis nyiam, nws *chim siab* thaum nws tas sim neej.

Thiab tus viv ncaus thib peb, nws siv tas nws lub neej kom zoo siab thiab siv zog hu nws zaj nkauj thaum nws luag nyav, nws yeej *zoo siab* thaum nws tas sim neej.

Yus lub neej yeej tsis zoo li no txhua lub sij hawm, thiab tib neeg yeej tsis muaj ib lub siab zoo ib yam li peb tug viv ncaus nyob hauv zaj dab neeg no. Tiam sis txawm tias lawv coj yam ntxwv heev li los lawv yeej qhia tau peb ib yam dab tsi txog peb tus kheej. Yog tias nej zoo li peb feem coob, tej zaum nej twb pom nej tus kheej nyob hauv ib tug, ob tug, los yog tej zaum tag nrho peb tug viv ncaus no. Cia peb ua tib zoo kawm txog txhua tus.

Tus uas Raug Teeb Meem

Tus viv ncaus thib ib xav tias nws yog ib tug uas raug teeb meem—ib tug uas raug tej yam.¹ Zoo li pheej muaj tej yam uas nws raug uas ua rau nws tu siab heev. Vim nws ua neej zoo li no, nws cia lwm tus kav nws lub siab thiab nws txoj kev coj yam ntxwv. Thaum peb ua li no, txhua tus txoj kev xav yeej zoo li cua hlob uas nplawm peb mus ub mus no—thiab niaj hnuv nim no peb muaj social media txhua lub sij hawm, ntshe cov cua no nplawm peb zoo li cua daj cua dub.

Cov muam es, vim li cas nej yuav cia lwm tus, los yog ib pawg neeg, txiav txim txog nej txoj kev zoo siab, cov uas tsis hlub nej—los yog tsis xav li cas txog nej txoj kev zoo siab?

Yog tias nej txhawj tias lwm tus neeg hais li cas txog nej, thov cia kuv qhia nej txog qhov uas pab tau nej no: cia li nco ntsoov tias nej yog leej twg. Cia li nco ntsoov tias nej yog ib tug los ntawm Vajtswv lub nceeg vaj, cov ntxhais ntawm Leej Txiv thiab Leej Niam Nyob Saum Ntuj Ceeb Tsheej, uas kav thooob plaws saum ntuj.

Nej muaj Vajtswv caj ceg ntawm sab ntsuj plig. Nej muaj tej txiaj ntsim uas muaj txij thaum tau tsim nej sab ntsuj plig thiab nej tau kawm thaum lub sij hawm ntev heev nyob hauv lub neej ua ntej yug los hauv lub ntiaj teb. Nej yog ib tug me nyuam los ntawm Leej Txiv Saum Ntuj Ceeb Tsheej uas muaj siab hlub thiab kav ib txhis, Tsoom Tub Rog tus Tswv,

tus uas tau tsim qab ntuj khwb, muab cov hnuv qub tawm los nyob thooob plaws lub ntuj, thiab tso cov ntiaj teb kom ncig mus raws li tau teem tseg.

Nej nyob hauv Nws txhais tes.

Txhais tes zoo heev.

Txhais tes uas hlub.

Txhais tes uas saib xyuas.

Thiab tib neeg hais dab tsi txog nej los yeej yuav tsis hloov qhov ntawd. Lawv tej lus tsis muaj nqi dab tsi thaum piv txog tej uas Vajtswv tau hais txog nej.

Nej yog Nws cov me nyuam uas muaj nqis heev.

Nws hlub nej.

Txawm yog nej ua yuam kev, txawm yog nej tig mus deb ntawm Nws, Vajtswv hlub nej. Yog nej xav tias nej poob zoo, raug tso tseg, los yog tsis muaj leej twg nco nej—tsis txhob ntshai. Tus Tswv Yug Yaj Zoo yuav nrhiav nej. Nws yuav muab nej tsa saum Nws xub pwg. Thiab Nws yuav nqa nej rov qab mus tsev.²

Kuv cov muam, thov muab tej yam tseeb no cog rau hauv nej lub siab. Ces nej yuav kawm tias muaj ntau yam uas ua rau nej tsis tu siab, vim nej muaj ib txoj kev uas nyob mus ib txhis rau nej taug.

Tus Cawm Seej ntawm lub ntiaj teb twb txo Nws txoj sia kom nej thiaj xaiv tau taug txoj kev ntawd. Nej twb ris Nws lub npe; nej yog Nws cov thwj tim. Thiab vim muaj Nws, nej hnav tau cev thav ntxwv ntawm lub yeeb koob uas nyob mus ib txhis.

Tus uas Ntxub

Tus viv ncaus thib ob yeej chim siab rau neeg ntiaj teb. Zoo li nws tus viv ncaus uas tu siab, nws xav tias tej teeb meem nyob hauv nws lub neej yog lwm tus tsim xwb. Nws liam nws tsev neeg, nws cov phooj ywg, nws tus thawj thiab cov nrog nws ua hauj lwm, cov tub ceev xwm, cov neeg zej zog, lub Koom Txoos cov thawj coj, tej khaub ncaws uas neeg nyiam niaj hnuv nim no, nws twb liam lub hnuv ci ntsa iab dhau, thiab hmoov phem. Thiab nws hais lus npau taws rau lawv txhua tus.

Nws tsis tau xav tias nws yog ib tug neeg nyaum. Tsis yog li ntawd, nws tsuas xav tias nws pab nws tus kheej xwb. Nws ntseeg tias txhua leej txhua tus qia dub, siab me, thiab ntxub nws. Tiam sis nws yog tus uas muaj siab xav ua zoo—tus uas ncaj ncees thiab muaj kev hlub.

Tu siab uas muaj neeg coob uas xav zoo li tus viv ncaus chim siab no. Twb kawm li no nyob hauv kev tshawb fawb uas xav kawm txog ob pawg neeg txoj kev tsis sib haum. Ib feem ntawm kev tshawb fawb no, cov kws tshawb nrhiav tau xam phaj nrog cov Palestinians thiab cov Israelis nyob hauv Middle East, thiab cov Republicans thiab Democrats nyob hauv Teb Chaws Amelikas. Lawv kawm hais tias “txhua pawg xav tias lawv pawg ua tej yam los ntawm kev hlub tsis yog los ntawm kev ntxub, tiam sis thaum nug hais tias vim li cas lwm pawg tsis nrog lawv sib haum, [lawv] hais tias [lwm] pawg ua tej yam vim lwm pawg ntawd ntxub neeg.”³

Los yog hais tias, txhua pawg xav tias lawv yog “cov neeg zoo”—ncaj, siab zoo, thiab hais qhov tseeb. Tiam sis, lawv xav tias lwm pawg yog “cov neeg phem”—tsis txawj ntse, tsis ncaj, los yog phem.

Xyoo uas kuv yug los, lub ntiaj teb yeej ua tsov ua rog loj heeV uas ua rau tib neeg nyuaj siab kawg thiab tu siab tas zog. Cov neeg los ntawm kuv lub teb chaws twb pib kev tsov rog no—cov neeg uas xav tias lwm pawg yog neeg phem thiab yaum tib neeg kom ntxub lawv.

Cov uas lawv tsis nyiam lawv yuam kom nyob twj ywm. Lawv ua rau cov neeg no poob ntsej muag thiab hais tias cov neeg no zoo li dab. Lawv xav tias cov neeg poob qab—thiab tsis yog neeg. Thaum twg yus hais tias ib pawg neeg tsis zoo li ntawd, ces ntshe yus haj yam xav tias tsim nyog hais lus thiab ua tej yam kom tsim txom lawv.

Peb tsis nyiam xav txog tej yam uas tshwm sim nyob rau hauv lub teb chaws Yelemees thaum tiam 20.

Thaum twg ib tug neeg tawm tsam

peb los yog tsis sib haum nrog peb, yooj yim rau peb xav tias muaj dab tsi tsis zoo txog lawv. Thiab txij thaum ntawd los yeej yooj yim xav tias lawv muaj hom phiaj phem heev thaum lawv hais lus thiab ua tej yam.

Peb yeej yuav tsum sawv khov kho rau tej yam uas zoo, thiab tej lub sij hawm peb yuav tsum tsa peb lub suab txhawb nqa lub hom phiaj ntawd. Tiam sis, thaum peb muaj kev chim siab los yog kev ntxub—thaum peb cem lwm tus kom lawv mob siab, poob ntsej muag, los yog ua rau lawv nyob twj ywm—ntshe peb ua tsis ncaj ncees.

Tus Cawm Seej tau qhia dab tsi?

“Tiam sis nim no kuv qhia rau nej hais tias, hlub nej cov yeeb ncuab thiab thov Vajtswv pab rau cov uas tsim txom nej,

“Yog nej ua li no, nej thiaj yog Leej Txiv tus uas nyob saum ntuj cov me nyuam.”⁴

Nov yog tus Cawm Seej txoj kev. Yog yam thib ib peb yuav tsum ua kom rhuav tej yam uas ua rau tib neeg npau taws, ntxub, tsis sib haum, thiab tsim kev tsim txom nyob hauv lub ntiaj teb.

Tej zaum nej yuav hais tias, “Yog mas, kuv txaus siab hlub kuv cov yeeb ncuab—tsuas yog lawv txaus siab ua ib yam li ntawd thiab.”

Tiam sis qhov ntawd tsis tshua tseem ceeb, puas yog? Peb lav ris peb txoj kev ua ib tug thwj tim, thiab yeej tsis nyob ntawm seb lwm tus ua li cas rau peb hlo li. Peb yeej cia siab hais tias lawv kuj yuav to taub thiab muaj kev siab hlub, tiam sis peb txoj kev hlub *lawv* yeej tsis nyob ntawm seb lawv xav li cas txog *peb*.

Tej zaum peb txoj kev siv zog kom hlub peb cov yeeb ncuab yuav ua rau lawv lub siab mos siab muag thiab xav ua zoo. Tej zaum yuav tsis ua li ntawd. Tiam sis txawm li cas los xij peb txoj kev cog lus kom koj raws li Yexus Khetos yuav tsis hloov.

Yog li ntawd, vim peb yog cov mej zeej ntawm Yexus Khetos lub Koom Txoos, peb yuav hlub peb cov yeeb ncuab.

Peb yuav kov yeej kev npau taws los yog kev ntxub ntxaug.

Peb yuav muaj lub siab hlub tag nrho Vajtswv cov me nyuam.

Peb yuav ncav tes foom koob hmoov rau lwm tus thiab txhawb pab lawv—txawm yog cov uas “cem [peb], thiab tsim txom [peb].”⁵

Tus Thwj Tim Tiag Tiag

Tus viv ncaus thib peb koj yam ntxwv zoo li Yexus Khetos tus thwj tim tiag tiag. Nws tau ua ib yam uas nyuaj kawg: nws tso siab rau Vajtswv txawm yog nws raug luag thuam nws. Nws ho txhawb nws txoj kev ntseeg thiab kev cia siab, txawm yog lwm tus cem thiab thuam nws ib puag ncig. Nws ua neej xyiv fab heev tsis yog vim nws nws raug tej yam zoo tiam sis yog vim *nws* xyiv fab.

Tsis muaj leej twg uas ua neej es tsis muaj dab tsi tawm tsam lawv. Yog tias muaj ntau yam uas sim ua rau peb ua yuam kev, peb yuav ua li cas kom tsom ntsoov rau kev zoo siab loj tshaj plaws uas Vajtswv cog lus cov neeg ncaj ncees yuav muaj?

Kuv ntseeg tias peb txais tau lus teb nyob hauv ib tug yaj saub zaj npau suav ntau txhiab xyoos tas los. Tus yaj saub lub npe hu ua Lihais, thiab nws zaj npau suav los muaj nyob hauv Phau Ntawv Maumoos uas yog ib phau zoo kawg nkaus thiab muaj nqis.

Nyob hauv nws zaj npau suav, Lihais pom ib tshav dav dav thiab, nyob haud, muaj ib tsoob ntoo uas zoo nkauj tshaj qhov piav tau. Nws kuj pom tej pawg neeg coob mus kev rau tsoob ntoo. Lawv xav saj cov txiv ntoo zoo. Lawv xav thiab tso siab tias cov txiv ntawd yuav ua rau lawv zoo siab kawg thiab nyob kaj siab lug.

Muaj ib txoj kev nqaim uas mus txog tsoob ntoo, thiab nyob ntawm ib sab muaj ib tug nqaj hlau uas pab lawv koj nraim txoj kev. Tiam sis kuj muaj kev tsaus ntuj uas muaj huab zig niab uas ua rau lawv tsis pom txoj kev thiab tsoob ntoo. Thiab tej zaum qhov uas txaus ntshai tshaj yog tej suab luag thiab thuam los ntawm lub

tsev loj thiab dav nyob ze. Xav tsis thoob vim li cas qhov uas luag thuam li ntawd ua rau ib txhia neeg uas twb txog ntua tus ntoo thiab saj cov txiv ntoo zoo lawm txaj muag thiab tawm mus.⁶

Tej zaum lawv pib ua xyem xyav hais tias tsoob ntoo puas zoo nkauj npaum li lawv ib txwm xav. Tej zaum lawv pib tsis paub tseeb qhov uas lawv twb noj lawm puag yog tiag tiag.

Tej zaum lawv xav tias yog lawv tig mus ntawm tsoob ntoo mus, ces lawv lub neej yuav yooj yim dua. Tej zaum lawv tsis xav cia lwm tus luag thiab thuam lawv ntxiv.

Thiab tsis tas li ntawd, thaum saib cov neeg uas thuam lawv, cov neeg ntawd zoo siab thiab muaj kev lom zem. Yog li ntawd, tej zaum yog lawv tso tsoob ntoo tseg, cov neeg nyob hauv lub tsev loj thiab dav yuav tos txais lawv thiab yuav qhuas lawv txog lawv txoj kev txawj ntse, txoj kev muaj peev xwm, thiab laj lim tswv yim.

Raws Nraim txoj Kev

Cov muam, cov phooj ywg zoo, yog tias nyuaj rau nej tuav rawv tus nqaj hlau thiab taug kev mus rau txoj kev cawm seej; yog tias lwm tus luag thiab thuam nej ua rau nej ua xyem xyav; yog tias muaj tej lus nug los yog tej lus qhuab qhia uas nej tseem tsis to taub; yog tias nej nyuaj siab vim muaj tej kev poob siab, kuv yaum kom nej nco txog Lihais zaj npau suav.

Raws nraim txoj kev!

Tsis txhob tso tus nqaj hlau tseg—uas yog Vajtswv txoj lus!

Thaum twg ib tug neeg sim ua kom nej txaj muag vim nej txais yuav Vajtswv txoj kev hlub, tsis txhob mloog lawv.

Cia li nco ntsoov, nej yog Vajtswv cov me nyuam; Nws yuav foom hmoov rau nej; yog nej kawm txog Nws cov lus qhia, nej yuav rov nyob nrog Nws!⁷

Tej lus cog tseg hais tias neeg ntiaj teb yuav qhuas thiab txais yuav nej

yeej tsis muaj tseeb thiab yuav tsis ua rau nej txaus siab. Vajtsvw cov lus cog tseg yeej muaj tseeb thiab ua rau nej zoo siab—tam sim no thiab nyob mus ib txhis.

Kuv caw nej xav txog kev teev ntuj thiab kev ntseeg zoo li Vajtsvw xav. Tsis muaj dab tsi nyob hauv lub tsev loj thiab dav uas zoo npaum li cov txiv ntoo kev ua neej raws li Yexus Khetos txoj moo zoo.

Muaj tseeb tiag, “tej uas qhov muag tsis tau pom los sis qhov ntsej tsis tau hnov, thiab tej uas neeg lub siab xav tsis txog hais tias yuav muaj los. Vajtsvw npaj tej ntawd tseg rau cov neeg uas hlub Vajtsvw lawm.”⁸

Kuv tau kawm kuv tus kheej hais tias txoj kev taug ua ib tug thwj tim nyob hauv Yexus Khetos txoj moo zoo yeej yog kev xyiv fab. Yog kev kaj siab lug thiab kev nyab xeeb. Yog kev tseeb.

Kuv ua tim khawv hais tias los ntawm lub txiaj ntsim thiab lub hwj chim ntawm tus Vaj Ntsuj Plig Dawb Huv, nej kawm tau qhov no nej tus kheej.

Txij no mus txog lub sij hawm ntawd, yog tias nyuaj rau nej mus kev, kuv cia siab hais tias nej yuav nrhiav tau lub dag zog thiab kev txhawb nqa nyob hauv cov koom haum ntawm lub Koom Txoos: lub Koom Haum Me Nyuam Yaus, Koom Haum Ntxhais Hluas, thiab Koom Haum Niam Tsev. Tej no yeej zoo li tej qhov chaw nres ntawm txoj kev, uas ua rau nej rov qab muaj kev tso siab thiab kev ntseeg mus tom ntej. Tej no zoo li ib lub tsev uas nyab xeeb, nej thiaj li paub tias nej muaj chaw nyob ntawd thiab nej cov viv ncaus thiab cov uas nrog nej ua thwj tim txhawb nqa nej.

Tej uas nej kawm nyob hauv lub Koom Haum Me Nyuam Yaus npaj nej rau qhov tseeb ntxiv uas nej kawm thaum nej yog cov ntxhais

hluas. Txoj kev ua ib tug thwj tim uas nej taug nyob hauv nej lub Koom Haum Ntxhais Hluas hoob kawm pab nej sib raug zoo thiab ua viv ncaus nyob hauv lub Koom Haum Niam Tsev. Txhua zaus nej mus, nej yuav muaj cib fim ntxiv qhia lwm tus tias nej hlub lawv los ntawm tej yam nej ua nrog kev ntseeg, kev khuv leej, kev siab hlub, siab zoo, thiab kev xav pab.

Kev xaiv txoj kev ua thwj tim ua rau yus muaj kev zoo siab thiab kev vam meej ntau kawg.

Yeej yuav tsis yooj yim. Yuav tsum siv tej yam zoo tshaj uas nej muaj—tag nrho nej tej kev txawj ntse, kev txawj tsim, kev ntseeg, kev ncaj, lub dag zog, kev rau siab, thiab kev hlub. Tiam sis muaj ib hnub nej yuav nco txog tej yam uas nej tau ua, thiab auj, nej yuav zoo siab heev vim nej nyob ruaj khov, nej tau rau siab ntseeg, thiab nej tsis tau khiav tawm ntawm txoj kev.

Thawb Mus Lawm Tom Hauv Ntej

Tej zaum muaj ntau yam hauv nej lub neej uas nej kav tsis taus. Tiam sis thaum kawg, nej muaj hwj chim xaiv qhov chaw uas nej xav mus thiab tej yam uas muaj los rau nej thaum nej ua neej. Tsis yog tej uas nej txawj ua, tiam sis yog tej uas nej xaiv ua uas hloov tau nej lub neej.⁹

Nej yuav tsum tsis txhob cia tej uas nej raug ua rau nej tu siab.

Nej yuav tsum tsis txhob cia lawv ua rau nej chim siab.

Nej yuav tsum xyiv fab vim nej yog Vajtsvw cov ntxhais. Nej yuav tsum nrhiav kev xyiv fab thiab kev zoo siab los ntawm Vajtsvw txoj kev tshav ntuj thiab Yexus Khetos txoj kev hlub.

Nej yuav tsum zoo siab.

Kuv thov kom nej muaj siab ua Vajtsvw tsaug rau Vajtsvw txoj kev npluas mias thiab txoj kev zoo tsis

tu tsis tseg. Kuv cov muam uas kuv hlub, nej ua tau qhov no! Kuv thov kawg siab kawg ntsws hais tias nej yuav xaiv thawb mus lawm tom hauv ntej mus txog tsoob ntoo uas cawm txoj sia. Kuv thov kom nej yuav xaiv tsa nej lub suab thiab ua neej zoo li nej ua zaj suab paj nruas uas qhuas Vajtsvw, qhuas txog tej uas Vajtsvw txoj kev hlub, tej txuj ci tseem ceeb ntawm Nws lub Koom Txoos, thiab Yexus Khetos txoj moo zoo yuav pub rau neeg ntiaj teb.

Tej zaum ib txhia yuav xav tias zaj nkauj ntawm kev ua thwj tim tiag tiag yeej nrov dhau los yog tsis zoo mloog. Txij thaum ntuj tsim teb raug, yeej zoo li no.

Tiam sis raws li peb Leej Txiv Saum Ntuj Ceeb Tsheej xav, thiab cov uas hlub thiab hwm Nws xav, yeej yog ib zaj nkauj uas muaj nqis thiab zoo nkauj kawg—yog ib zaj nkauj txog kev hlub uas txhiv dim thiab kev pab ua hauj lwm rau Vajtsvw thiab cov neeg zej zog uas ua rau yus hloov ua neeg dawb huv.¹⁰

Vim kuv yog tus Tswv ib tug Thwj Tim kuv foom koob hmoov rau nej kom nej yuav muaj dag zog thiab ua siab loj vam meej ua Vajtsvw cov ntxhais thaum nej zoo siab taug kev txhua hnub taug txoj kev ua cov thwj tim. Los ntawm Yexus Khetos lub npe dawb ceev, amees.

LUS CIM

- 1.Saib 2 Nifais 2:14, 26.
- 2.Saib Lukas 15:4–6.
- 3.Boston College, “Study Finds Intractable Conflicts Stem from Misunderstanding of Motivation,” *ScienceDaily*, Kaum Ib Hlis Ntuj 4, 2014, sciencedaily.com.
- 4.Mathais 5:44–45.
- 5.Mathais 5:44.
- 6.Saib 1 Nifais 8.
- 7.Saib “I Am a Child of God,” *Children’s Songbook*, 2–3.
- 8.1 Kaulleethaus 2:9.
- 9.Saib “The Most Inspirational Book Quotes of All Time,” pegasuspublishers.com/blog.
- 10.Saib Amas 5:26.